

Itali berdepan krisis politik

REUTERS

November 10, 2011

ROM 9 Nov. - Itali bakal berdepan pergolakan politik berpanjangan, selepas Perdana Menteri, Silvio Berlusconi bersetuju meletakkan jawatan, setelah kehilangan majoriti di Parlimen ekoran anggota partinya belot.

Berlusconi mengesahkan kenyataan Presiden Giorgio Napolitano bahawa beliau akan berundur sebaik-baik sahaja Parlimen meluluskan pembaharuan bajet yang dituntut oleh para pemimpin Kesatuan Eropah (EU) bagi membantu Itali mengelakkan krisis hutang yang mengancam zon mata wang euro.

"Kami tidak lagi mempunyai majoriti yang diyakini, kerana itu kami perlu mengakui perkara ini dan mengambil kira apa yang berlaku di pasaran kewangan, kami perlu menunjukkan kepada pasaran bahawa kami serius," kata Berlusconi kepada televisyen Itali.

Pengundian di kedua-dua dewan Parlimen berhubung usul pembaharuan bajet itu dijangka berlangsung bulan ini, perkembangan yang menandakan berakhirnya dominasi Berlusconi, seorang jutawan media yang dibelenggu skandal seks sepanjang menguasai politik Itali sejak 17 tahun lalu.

Kegagalan beliau melaksanakan pembaharuan mencetuskan pemberontakan dalam partinya dan Berlusconi memberitahu stesen televisyen Canale 5, satu-satunya pilihan yang beliau ada ialah mengadakan pilihan raya awal, walaupun ini boleh memanjangkan situasi tidak menentu yang menjejaskan keyakinan pasaran.

Napolitano berkata, beliau akan mengadakan rundingan dengan pelbagai pihak mengenai pembentukan kerajaan baru.

Pasaran dan Presiden itu sendiri dipercayai menyokong penubuhan sebuah kerajaan perpaduan nasional atau kerajaan teknokrat.

Kerajaan Berlusconi memenangi pengundian penting mengenai bajet di Parlimen, semalam selepas pembangkang enggan mengundi tetapi beliau gagal memperoleh majoriti, sekadar mendapat 308 undi di dewan rendah yang mempunyai 630 kerusi, kurang lapan untuk mencapai 316 undi yang diperlukan bagi menjamin kelulusan.

Berlusconi, 75, mengalami tekanan sejak berminggu-minggu lalu, disebabkan pelbagai skandal seks dan undang-undang, kekalahan politik, dan paling penting, kehilangan keyakinan terhadap negara ini di pasaran antarabangsa.

Namun, beliau berkeras tidak mahu meletakkan jawatan sehinggalah pengundian semalam, sebaliknya berhempas pulas hingga ke saat-saat akhir untuk cuba mendapat kembali sokongan 'pemberontak' dalam Parti Kebebasan Rakyat (PDL) pimpinannya.

Pengundian itu menunjukkan beliau gagal membendung pemberontakan, dan kekecewaan Berlusconi didedahkan oleh seorang jurugambar yang merakamkan perkataan '8 pembelot' ditulis pada kertas nota beliau di Parlimen selepas keputusan undi dibacakan oleh Speaker. - Reuters

Copyright REUTERS 2011. REUTERS text, photos, graphics and logos shall not be reproduced, published, broadcast, rewritten for broadcast or publication or redistributed directly or indirectly in any medium. REUTERS shall not be held liable for any delays, inaccuracies, errors or omissions in any REUTERS content, or for any actions taken in consequence

Source:

http://www.utusan.com.my/utusan/info.asp?y=2011&dt=1110&pub=Utusan_Malaysia&sec=Luar_Negara&pg=lu_01.htm